

**Nukissiornermi ikummatissat akitsuutaat pillugit Inatsisartut inatsisissaattut siunnersuut nr. xx. xxxx 2010- meersoq**

*Nukissiornermi ikummatissanik assigisaanillu akitsuusiineq*

§ 1. Kalaallit Nunaanni ikummatissat uuliamik, aamarsuarnik, gassinik, motorinullu ikummatissanik kiassarnermut, innaallagissiornermullu atuinermi akitsuummik akiliisoqartassaaq.

*Imm. 2.* Akitsuutit makkuupput:

1) Gassi, solaarillu assigiinngitsut tamaasa, pitruuliu ilanngullugu. Jet A 1 assigisaalu	Liiterimut 15° C	0 kr. 25 øre
2) Fueluulia	Tonsimut	284 kr. 50 øre
3) Bensiinat suulluunniit Motorinut orsussat, timmisartut orsussaat assigisaallu	Liiterimut 15° C	0 kr. 25 øre
4) Gassi sunaluunniit, naturgassi, gassi puiaasaniittoq assigisaalu	Nm3-mut	276 kr. 00 øre
5) Aamarsuit suulluunniit, stenkul, jordoliekokks, brunkul, qisummit usserusiat (trætjære) assigisaallu	Tonsimut	183 kr. 50 øre

*Imm. 3.* Kiassarnermi, innaallagissiornermi, motorilluunniit ikummatissaattut atorpeqartut akuleriiaat inatsit una naapertorlugu akugitinneqartut, imm. 2 malillugu annerpaamik akitsuusigassat akitsuusiinermi naatsorsuutigineqassapput.

*Imm. 4.* Uuliakut imermik akullit umiarsuarnit pisut, kiassarnermi, innaallagissiornermiluunniit atorpeqartut imm. 2, nr. 1 malillugu ima akitsuuserneqassapput:

- 1) 35 pct. imermik 65 pct. sinnerluguluunniit akulik.
- 2) 70 pct. imermik annikinnerpaamik 30 pct.-imik 65 pct. inorlugu akulik.
- 3) 95 pct. annikinnerpaamik imermik 5 pct.-imik 30 pct. inorlugu akulik.
- 4) 100 pct. 5 pct. inorlugu akulik.

*Imm. 5.* Suliffeqarfinnut, aatsitassat pillugit ingerlatallu tamatumunnga pingaaruteqartut pillugit Inatsisartut inatsisaat naapertorlugu akuersissummik pigisaqartut, akinit imm. 2-4 mut taaneqartunit akitsuut akilertagassaat 10 procentiuvoq.

§ 2. Nioqqutissat Kalaallit Nunaanni suliat nioqqutissallu, nioqqutissanik eqquusuineq annissuinerlu pillugit Inatsisartut inatsisaanni § 6 malillugu akitsuuteqarfiusumut eqqunneqarneranni, kiassarnermut, innaallagissiornermut, motorilluunniit ikummatissaattut

naatsorsuussaangitsut taaneqartunut kingusinnerusukkut ikummatigineqalerpata akitsuutinik akiliisussaataaneq atuutilissaaq.

*Imm. 2.* Nioqputissat kiassarnermut, innaallagissiornermut, motorilluunniit ikummatissaattut atorneqartussat akitsuuteqarfiusumut eqqunneqarnerisigut akitsuutinik akiliisussaataaneq atuutilissaaq.

*Imm. 3.* Akitsuutinik akiliinissaaq akitsuutinik akiliisussaataanerup atulernerani aallartissaaq.

### *Suliffeqarfinnik assigisaannillu nalunaarsuineq*

**§ 3.** Suliffeqarfiit suliatik naapertorlugit akitsuusigassanik qalluisut, sanaartortut, eqqussuisulluunniit akileraartarnermut aqutsisoqarfimmi toqqortuisutut nalunaarsorneqassapput.

*Imm. 2.* Suliffeqarfiit allat nioqputissanik akitsuusigassanik atuisartut akileraartarnermut aqutsisoqarfimmut nalunaarsorneqassapput, suliffeqarfik akitsuusigassanik toqqortassanut annikinnerpaamik 1.000 m<sup>3</sup>-mik toqqorsiveqarunik. Suliffeqarfiit arlallit ataatsimoorussamik toqqorsiveqarunik toqqorsiviup annertussusaa naapertorlugu atugartik naapertorlugu akitsuummik akiliissapput.

*Imm. 3.* Toqqortuisutut nalunaarsornissaannut Naalackersuisut malittarisassaliorsinnaapput.

**§ 4.** Akitsuutinik akiliisussaataanerup atulernerani suliffeqarfiit, pisortallu suliffiutaat toqqorsiveqartutut nalunaarsorneqangitsut, inuillu ataasiakkaat akitsuusigassanik qalluisut, sanaartortut, eqqussuisulluunniit, akitsuutit atuutilerfianni akileraaruseriffimmut nalunaaruteqassapput.

### *Akitsuusigaanngitsumik toqqortuineq*

**§ 5.** Suliffeqarfiit toqqortuisutut nalunaarsorsimasut, akitsuusigaanngitsumik toqqortuisinnaanerannut akileraaruseriffiup akuersissummik tunisinnavaai. Toqqortugaq taamallaat tassaasinnaapput nioqputissat akitsuusigassat, akitsuuteqarfiup avataanut anninneqartussat nioqputissallu § 9 naapertorlugu akitsuuteqanngitsumik nioqputigineqartussat.

*Imm. 2.* Naalackersuisut akitsuusigaanngitsumik toqqortat pillugit piumasaqaasiorsinnaapput, tassunga ilanngullugit naatsorsuusiordermi nakkutilliinermilu maleruagassat aalajangiiffigisinnaallugulu akileraaruseriffiup akuersissutinik tunisineranut atatillugu qularnaveequtinik piumasaqaasiorsinnaanerit.

*Akitsuutinik akiliiffissamik piffissarititaaq, akitsuusigassallu annertussusaasa naatsorsortarnissaat*

**§ 6.** Toqqortuisutut nalunaarsorneqarsimasut qaammatit tamaasa akitsuummik akiliisassapput.

**§ 7.** Toqqortuisutut nalunaarsorneqarsimasut kiassarnermut, innaallagissiornermut, motorilluunniit ingerlatisaattut ikummatissanik akitsuusigassanik atuisut, § 2, imm. 1 malillugu annasaqarnermik assigisaannillu, § 2, imm. 2 tunngavigalugu akitsuuteqarfiusumut eqqussuisimanermik, akitsuusikkanillu qanoq annertutigisunik pigisaqarnertik naatsorsuusiussavaat, nioqputissat akitsuutillit, § 5, imm. 1 naapertorlugu akitsuusigaanngitsumik toqqortat

ilanngaatigalugit. Naatsorsuinerimi malittarisassat suunerinik akileraaruseriffik erseqqissaateqassaaq.

*Imm. 2.* Pisuni ataasiakkaani suliffeqarfiit inuilluunniit ataasiakkaat pissarsinerini, tigusineriniluunniit pissarsiat annertussusaat tamarmik immikkut isigineqassapput.

*Imm. 3.* Toqqortuisutut nalunaarsoqqasut akitsuusigassanik qanoq annertutigisumik pigisaqarnerisa naatsorsornissaannut Naalakkersuisut malittarisassaliorsinnaapput.

**§ 8.** Akitsuusigassat qanoq annertutiginerannik naatsorsuinerimi § 7 malillugu makku ilanngaataassapput

- 1) nioqqutissat akitsuuteqarfiusup avataanut anninneqartut,
- 2) nioqqutissat § 9 malillugu akitsuusigassaannngitsut, kiisalu
- 3) nioqqutissat suliffeqarfimmi, suliffeqarfimmulluunniit angallanneranni ikuallattoornikkut, ernartoorikkut, assigisaanilluunniit pisoqarneragut annaasaqaatit.

*Imm. 2.* Imm. 1 -imi aalajangersagaq nioqqutissanut akitsuusigaannngitsunut atuutinngilaq.

#### *Akitsuutinik akiliinngitsoorsinnaaneq, akitsuutinillu akiliutaavallaartunik utertoortisineq*

**§ 9.** Toqqortuisutut nalunaarsorsimasoq akitsuusigassanik makkununga ingerlatitseqqissimappat akitsuusiisoqassannngilaq

- 1) umiarsuit nunanut allaliartaatit, tassunga ilanngullugit umiarsuit takornarianik angallassissutit,
- 2) umiarsuit uuliasortut gassisiortullu 1.500 bruttotonnage imalt. bruttoregistertonnage qaangerlugulu oqimaassusillit
- 3) timmisartut nunanut allanut timmisartuussisartut,
- 4) aalisariutit Kalaallit Nunaanni angerlarsimaffeqartutut nalunaarsorneqarsimannngitsut, aamma
- 5) aalisariutit 200 bruttotonnage imalt. bruttoregistertonnage qaangerlugulu oqimaassusillit, Kalaallit Nunaanni angerlarsimaffeqartutut nalunaarsorsimasut.

*Imm. 2.* Akitsuusiinnginnissami piunasaqaataavoq nioqqutissaq umiarsuup, timmisartup, aalisariutilluunniit ingerlannissaanut atugassaq toqqaannartumik maqinneqarnissaa.

*Imm. 3.* Akitsuutinik akiliinnginnissamut naatsorsuinerimi nakkutilliinermilu malittarisassat Naalakkersuisut aalajangersarsinnaavaat.

#### *Akiliisussaatitaaneq*

**§ 10.** § 2, imm. 1 malillugu akitsuutip atuutilernerani nioqqutissamik piginnittup akitsuut akilissavaa.

*Imm. 2.* § 2, imm. 2 malillugu akitsuutip atuutilernerani akitsuusigassamik pigisaqalersoq akitsuummik akiliissaaq.

#### *Naatsorsuusiornermi aalajangersakkat*

**§ 11.** Toqqortuisut § 3, imm. 1 malillugu nalunaarsorsimasut nioqqutissanik akitsuusigaannngitsunik qalluisut, sanaartortut, eqqussisut imalt. annissisut § 8 aamma § 9, imm. 1 malillugit tunisatik, atukkatillu naatsorsuusiussavaat.

*Imm. 2.* Toqqortuisut allat § 3, imm. 2 malillugu nalunaarsorsimasut pigisaqalernerminnik, tunisinerminnik, suliffeqarfimminniluunniit akitsuusigassanik atugaqarsimanerminnik naatsorsuusiussapput.

*Imm. 3.* Toqqortuisumit, akuersissummilluunniit pigisaqartumit ingerlateqqitat allagartaanni paasissutissatut allaqqassapput ulloq atortuulerfia, pilersuisup aqqa, tiguisussap aqqa, tunniussivissaq, nioqutissap suunera annertussusaalu, akitsuutillu annertussusaa.

*Imm. 4.* Suliffeqarfiit naatsorsuusiukkatik, tunisamik allagartaat, assilineri, naatsorsuunitillu ukiup naatsorsuiffiusup kingorna ukiut tallimat toqqortarissavaat.

#### *Akitsuummik naatsorsuineq*

**§ 12.** Akitsuutinik akiliiffissap naanerata kingorna kingusinnerpaamik qaammatit ulluisa 15-ii tamaasa toqqortuisutut akuersissutillit akitsuusigassanik qanoq annertutigisunik uninngasuuteqarnerminnik § 7, imm. 1, aamma § 8 malillugit akileraaruseriffimmut nalunaaruteqartassapput. Akitsuutinik akiliiffissap ukiup affaasa qaangiunneri tamaasa qaammatip ulluisa 15-iat kingusinnerpaamik akileraaruseriffimmut akilerneqartassapput.

*Imm. 2.* Akitsuutinik akiliisussaataasut § 4 malillugu akitsuutip atuutilerneranit kingusinnerpaamik ullut 14-it qaangiunnerini akitsuut akileraaruseriffimmut akilertassavaat. Malittarisassani § 7, imm. 2-mi allaqqasut malillugit akitsuusigassat annertussusaat, suunerilu naatsorsorneqartassapput.

**§ 13.** Akileraaruseriffiup piumasarinnaavaa toqqortuisutut akuersissuteqartoq piffissaagallartillugu akitsuummik akiliisimangitsoq nioqutissap tigungerani nioqutissap suuneranik nalunaaruteqartalernissaa. Akileraaruseriffiup ilanngullugu piumasarinnaavaa suliffeqarfiup nioqutissanik pigisaqalernera ilutigalugu akitsuummik akiliisalernissaa.

**§ 14.** Akitsuusigassaq allamut ingerlateqqikkaanni, pissarsiarigaanni, atoraanniluunniit, inatsit malillugu akitsuut akilinngitsoorneqarsimappat, akiligassat ullut 14-it qaangiutsinnagit akileqquneqassapput. Suliffeqarfiup naatsorsuutini tunngavigalugit akiligassap annertussusaa naatsorsorsinnaangippagu akileraaruseriffiup missingissersorlugu akiligassap annertussusaa naatsorsorsinnaavaa.

*Imm. 2.* Nioqutissat akitsuusigassat § 9 malillugu akitsuusigassajunnaartut siunertaq uniorlugu atorneqarsimappata akileraarnermut aqutsisoqarfiup aalajangersinnaavaa suliffeqarfik akitsuuteqanngitsunik pissarseqqissinnaajunnaassasoq. Nioqutissat pineqartut pillugit, akileeqqusinermiit kingusinnerpaamik ullut 14-it qaangiutsinnagit akitsuut suliffeqarfimmit akilerneqassaaq.

*Imm. 3.* Suliffeqarfiup akitsuutitaqanngitsunik pissarsinnaaneranut akileraaruseriffiup atorunnaarsitsinermini, akuersissutillip nalunaarsorneqarsimasup, akitsuutitaqanngitsunik siunissami pissarseqqissinnaanginneranik nalunaarfigisinnaavaa.

#### *Pineqaatissinerit*

**§ 15.** Piaaraluni mianersuaalliorluniluunniit iliuuseqartoq akiliisinneqassaaq

- 1) akitsuutinik nakkutilliinermut, akitsuutinilluunniit akiliivallaarsimalluni utertoortisinissanut paasissutissanik nipangiussisoq, eqqunngitsunik, paatsiveerussaataasunilluunniit tunniussisoq,
- 2) § 3, imm. 1-imik, § 4, § 5 imm. 1, imaluunniit § 11, imm. 1-4-mut unioqutitsisoq,
- 3) § 13, imm. 1-imik peqqusummik nalunaarutigeriikkamik unioqutitsisoq,

4) inatsit malillugu nioqqutissanik akitsuusigassanik akilerneqanngitsunik ingerlatitseqqittoq, pigisaqalersoq, pissarsisoq, taakkuninngaluunniit misiliisoq.

*Imm. 2.* aktianik piginneqatigiiffik, piginneqataassuteqarluni piginneqatigiiffik, piginneqatigiilluni piginneqatigiiffik, peqatigiiffik, suliffeqarfik imminut ingerlattoq, aningaasaateqarfik assigisaaluunniit imm.1-imik unioqqutitsippata inatsisitigut pisinnaatitaasoq pisussaataasorlu akiliisineqassaaq. Namminersorlutik Oqartussat, kommuni, kommunilluunniit kattuffiat unioqqutitsippata, Namminersorlutik Oqartussat, kommuni, kommunilluunniit kattuffiat akiliisineqassapput.

**§ 16.** Akileraaruseriffiup nalilerpagu unioqqutitsineq akiliisitsinermik eqqartuussisulersuussinertaqanngitsumillu naammassineqarsinnaasoq, akiligassaqalersimasorlu unioqqutitsinernik nassuerutiginnippat, piffissaliussallu iluani, sivitsorneqarsinnaasumi, akiligassaminik akiliisinnaalluni nalunaaruteqarpat, Naalakkersuisut taakkualuunniit pisinnaatitaata nalunaarummi akiligassap annertussusilerneqarnera malillugu akiliisitsinermik suliaq naammassisinnaavaat.

*Imm. 2.* Kalaallit Nunaanni inatsisinik atortitsinermi, unnerluussisussaanneri malittarisassat imm. 1-imi nalunaarummut pineqartumut atuutissapput.

*Imm. 3.* Akiligassaq piffissaliussap iluani akilerneqarpat, akilersinneqarpalluunniit, akiliisitsiniarluni malersuineq taamaatitinneqassaaq.

**§ 17.** Najoqqutassanik inatsit una naapertorlugu maleruagassaliortoqarsinnaavoq, najoqqutassanik unioqqutitsisoqarsimatillugu akiliisitsisoqarsinnaanngorlugu.

*Imm. 2.* Najoqqutassanik inatsit una naapertorlugu maleruagassaliortoqarsinnaavoq, piginneqatigiit, aktianik piginneqatigiiffik, piginneqataassuteqarluni piginneqatigiiffik, piginneqatigiilluni piginneqatigiiffik, peqatigiiffik, suliffeqarfik imminut ingerlattoq, aningaasaateqarfik assigisaaluunniit, Naaminersorlutik Oqartussat, kommuni, kommunilluunniit kattuffiat najoqqutassanik unioqqutitsisoqarsimatillugu akiliisitsisoqarsinnaanngorlugu.

**§ 18.** § 15 aamma § 17 tunngavigalugit akiliisitsinerit landskarsip pissarsiassarai.

#### *Atortuulerneru*

**§ 19.** Inatsit atortuulissaaq 1. januar 2011, nioqqutissanut § 2 naapertorlugu akitsuuteqalersussanut 1. januar 2011 kingusinnerusukkulluunniit atuutilissaaq.

*Namminersorlutik Oqartussat, ulloq xx.xxxx 2010*

Kuupik Kleist

/

Palle Christiansen

